

## lis Gnovis

## DEVENTÀ INFERMÏR?

Oportunitât contade dai fantats di YoupalTubo



I fantats dal canâl furlan "YoupalTubo" di YouTube a tornin a fevelâ intal lôr ultin video di un teme cuntun valôr sociâl une vore fuart, invidant i zovins come lôr a rifleti su la oportunitât di diventâ infirmîr. Par podê fâ cheste profession si à di seguî un percors di studis une vore diferent di chel di une volte e che, cu la Universitât dal Friûl, al permet di imparâ ançe midiant di un centri di simulazion di avanvuardie. La clip e tache cun Mattia Cantarutti e Federico Iob (Chei di Udin) che, cuntun mateç simpatic, a introdusin par prins di chest argoment. Daûr, Desiree Chiappo Debegnach e met subit "ordin" e e rimarche la impuartance de figure professionâl dal infirmîr; po dopo a intervegnin Federico Benedet, Davide Buccheri e Lucia Bello. Chesçj zovins youtubers, cun chei altris compagns di "aventuris", a son i protagoniscj dal canâl là che a contin lis lôr passions, flevant in lenghe furlane di contignûts e curiositâts dal Friûl. ARLeF, Agjenzie regionâl pe lenghe furlane, e poie il progjet realizât cu la colaborazion de Universitât dal Friûl, dal Centri di Simulazion e Alte Formazion, dal Dipartiment di Medisine de Universitât dal Friûl e dal Cors di Lauree in infirmieristiche, sedis coordinadis di Udin e Pordenon.

## PORDENON. Un meteorit si sfante tal cîl

Tal cîl ancjemò clâr dal amont, che a jerin di pôc passadis lis nûf sot sere di une zornade de fin di Lui, tancj di lôr a àn viodût, tal cîl parsore di Pordenon, passâ une sorte di bale luminose che e sflandorave di flamis di fûc, par dopo sparî dal dut. Ce jerial succedût? Lu àn sclarît chei des stazions de rêt taliane di vigilance des meteoris e de atmosfere: si jere tratât de colade di un meteorit sore di Pordenon. La bale e jere stade viodude ançe in altris bandis di Italie e in tancj País forescj, ma a Pordenon, pôcs seconts daspò la sô aparizion, si jere distudade, a une cuote di cirche 35 chilometris e a une velocitât di 3 chilometris al secont. Secont chei de Associazion pordenonese di astronomie, cualchi fruçon di chel meteorit al podarès jessi colât te aree nord-est di Pordenon, e cualchidun ancjemò plui lizêr in areis dai país vicins. Se cualchidun al cjatâs un fruçon di chel meteorit, impen di taponâlu in cjase, al fassarès ben a puartâlu a chei de Associazion, parcè che il lôr studi al è impuartant pe sience.

## LUSSARI. Une vacje salvade dai pompîrs

E jere sbrissade jù par un sdrup, une puare vacje che, cirint jerbe di mangjâ, no si jere inacuarde dal pericol che e stave corint, e e jere tombolade tun sdrup des bandis de Malghe Lussari, intun puest un pôc masse sacraboltât par vignîndi fûr dibessole. Di bon che a son rivâts svelts i pompîrs cun dute la monture che si à dibisugne in câs come chesçj, e cun dute la competence e braûre che duçj ur ricognossin. Le àn puartade intun puest dulà che si podeve recuperâ, le àn bendade par vie che no cjapàs pôre, parcè che al jere il so prin viaç in elicotar, e le àn imbragade, puartantle fin li de Malghe Lussari, dulà che e je stade visitade di un veterinari. La mari e il piçul che e à tal grim a stan ben, e miôr ancjemò il lôr proprietari.

Joibe 29	Martueri di S. Zuan	Lunis 2	S. Elpidi
Vinars 30	S.te Faustine	Martars 3	S. Grivôr
Sabide 31	S. Arisit	Miercus 4	S.te Rosalie
Domenie 1	XXII Domenie vie pal an	Il timp	Timp variabil



**Il soreli**  
Ai 29 al jeve aes 6.24 e al va a mont aes 19.51.



**La lune**  
Ai 3 Lune plene.

**Il proverbi**  
Il bisugn al fâs l'om inzegnôs.

**Lis voris dal mès**  
Par prevignî dams causionâts dal brut timp, o podês comprâ rêts anti-tampieste.

## Ardito Desio, di Palme al K2

Tal 1954 il palmarin al fo ideadôr e organizadôr de gnove spedizion taliane che e rivà a bon fin

**E** je la seconde montagne plui alte dal mont, il K2, cui siei 8.611 metris, chê che aes sis sot sere dai 31 di Lui dal 1954 Lino Lacedelli e Achille Compagnoni a concuistavin pe prime volte tal mont. In Italie, la gnove e rivà ai 4 di Avost cuntun telegram, e e fo cjapade no dome come une grande vitorie alpinistiche, ma ançe come une grande conquiste de bande di un País che al stave tirantsi sù des maseris de Seconde vuere mondiâl. Clâf di volte di cheste iniziative al fo il palmarin Ardito Desio, che tal 1929, zovin professôr di Gjeologie, ma za ben afermât tal mont academic, al veve partecipât a une spedizione par studiâ la glacere dal Baltoro e tentâ la conquiste dal K2, te cjadene dal Karakorum. E 25 agns dopo al sarès stât propit lui l'ideadôr e l'organizadôr de gnove spedizione taliane che e rivà a bon fin. Al fo propit lui, di fat, a convinci il President dal Consei di chê volte, Alcide De Gasperi, de impuartance de imprese, tignût cont dal fat che francês e inglês a vevin benzà otignudis grandis impresis, e che la Italie, ançe par un san spirt di patrie, no veve di jessi seconde a di nissun. Cul Pakistan, che al jere di pôc diventât indipendent, si cumbinà l'afâr: il vistât par jentrâ in chel País al varès vût come presit la realizazion, di bande di impresis talianis, di une grande dighe idroelettriche sul flum Indo. E cussì la spedizione, sot la vuide dal professôr Ardito Desio, e podê partî



Ardito Desio

**Ardito: un non che al è dut un program, e lui "ardito" lu è stât di non e di fat, moderni Ullis che al à organizât spedizions par dut il mont: om che par stature al pareve un scriç, ma cuntune volontât di fier, curiôs, cuntune vite dute spindude in non de sience**

pe conquiste dal K2, compagnade di biel principi di tantis polemichis massime pe escluson di cierts alpiniscj di fame, polemichis che a laran indenand ançe dopo la conquiste dal K2. Ardito: un non che al è dut un program, e lui "ardito" lu è stât di non e di fat, moderni Ullis che al à organizât spedizions par dut il mont: om che par stature al pareve un scriç, ma cuntune volontât di fier, curiôs, cuntune vite dute spindude in non de sience, che daspò i tornarà il cont cui interès, cemût che al scriverà tal libri 'Sulla via delle sete, del ghiaccio e dell'oro' (1987): "La scienza è ricca di dubbi e di interpretazioni, ma provvida di doni. Io ho beneficiato largamente di tali esperienze". E ançe la sô tiere, che par solit e je plui inceade dal forest, tant di rivà a discognossi i protagoniscj di cjase sô. Il professôr Desio no si jere tirât di bande quant che la "Patrie" lu veve clamât a impegnâsi par che il Friûl al ves la sô Universitât. Lu fasè ançe in public, te place dai Grans a Udin - a jerin i agns di une ferbinte, e un pôc romantiche, "contestazion

a la furlane", cu la sô vôs flevare ma ferme, par sostignî il dirit dal Friûl di vê la sô Universitât. E no si fasè preâ nancje par dâ il so non e la sô poie ae bataie politiche: no chê pal podê, ma a chê di chei che si davin di fâ, cun pôcs mieçs e mancun risorsis, par sostignî il svilup e la autonomie dal Friûl. A jerin lis primis elezions politichis dopo dal taramot dal '76, e il Friûl al scomençave a cîrî di tornâ a metisi in pîts, dopo chês dôs tremendis sacodadis dal Orcolat. Desio al acetâ di fâ part di une liste che e meteve adun i autonomiscj dal Moviment Friûl, il Comitât pe Universitât Furlane dal professôr Petracco e il Comitât di Coordinament des Tendopolis dai país taramotâts. Par cualchi centenâr di vôts la liste e mancjà la elezion di un so rapresentant tal Parlament di Rome, e mi pâr di ricuardâ che Desio nol ves vût il risultât che si sperave: ancjemò une volte il provincialism furlan le veve fate gruesse. Ma lui, moderni Ullis, daspò di vê viazât par dut il mont, al decidè di jessi sepulît a Palme, la Itache che al veve vût simpri tal cûr.

Roberto Iacovissi

## Tradizions furlanis dal mès par cure di Mario Martinis

## CUARTE DI AVOST

Di cualchi secul in ca in diviers país dal Friûl e esist la tradizion di celebrâ te cuarte domenie di avost une grande fieste che, tal moment "dal passaç" climatic-stagjonâl, e sierave cun solenitât la fin de astât. Chest al succedeva quant che lis fiestis a jerin pocjiss e cun setembar si veve di tornâ a lis voris de campagne cu lis vendemis de ue e, subit dopo, di duçj chei altris racuelts (patatis, blave, pomis e, une volte, ançe des fueis coladis che servivin pes bestiis ma ançe par jemplâ i paions). Difât, tal calendari de campagne cu la fin di avost si sierave dabon l'astât e alore e nassè la tradizion di inmanèa une ultime fiestone par di mandi ae bieles stagjon. In tâl maniere, la "Cuarte di Avost", che cjapà su la funzion



simboliche di ultime scansion festive stagjonâl, e veve simpri luminariis sflandorosis, musichis di contor, bai, cjantadis, baldoriis, bondance di mangjative e di vin e barachis cun ogni ben di Diu. Al bati de miezegnot, cuasi che fos pardabon la ultime gnot de astât, si jevavin sù berladis, si traevin mortarets e fûcs artificiâi che a difondevin il lôr cricâ tal cidin dulintor dai país, sclarint e colorant il grant cîl stelât. Tal doman i nestrîs vons a tornavin al timp gram, sclagn e lineâr di ogni dì, chel des voris agriculis, che si slungjave fin ae seconde metât dal autun, quant che si sierave il cicli agrari pôc e za si sintive i sgrisui dal rivà dal prin frêt.